

Centro Juvenil Washington ta celebra 50 aña trahando cu e hubentud di Aruba

Otro siman Centro Juvenil Washington (CJW) ta celebra su 50 aniversario cu un ceremonia y recepcion cu lo tuma luga dia-bierna, 19 juni 2015, di 7:00 p.m. pa 9:30 p.m. na CJW mes. CJW ta un organizacion Cristian cu pa 50 aña largo a dedica na formacion spiritual y moral di e hubentud di Aruba.

Henter e publico di Aruba ta invita na e evento di celebracion cu lo tuma luga otro siman. CJW specialmente kier invita personanan cu a yega di campa na e centro, of cu tin yiunan cu a campa na Washington.

Pa 7:00 p.m. lo cuminsa cu un ceremonia protocolar, caminda Ministernan concerni tambe a wordo invita. Tambe fundado di CJW lo ta presente na e evento special aki. Tur presente lo tin e oportunidad pa haci un donacion na e centro riba e anochi aki.

Durante e anochi aki lo tin un presentacion di e historia di Washington pa Presidente actual di e Centro Anselmo Croes. Lo tin pre-



sentacionnan musical, y lo tin tambe un mensahe presenta pa Pastoor Frederik Kelly.

Un poco historia

Centro Juvenil Washington a wordo funda na 1965 pa Iglesia Aliansa Evangelico pa misionero Betty Ratzlaff. E Mansion y e tereno rond di dje tabata pertenece na famia Henriquez, kende a pasa e tereno over pa CJW pa un suma hopi abou. Algun miembronan di famia Henriquez te hasta a duna nan parti di e tereno comple-

tamente como donacion e tempo ey.

CJW a wordo funda cu e meta pa "promove e desaroyo di hubentud Arubiano" door di crea un area caminda hobennan por practica deporte, door di organisa presentacionnan di comedia, canto y pelicula, discursionan, predicashi y reunionnan social. Tambe organisando campamentonan anual pa stimula amistad, y e bida spiritual, moral y social di hobennan. Durante añanan e Centro a bira hopi conoci den nos comunidad pa e campamenton-



an anual, caminda muchanan y hobennan ta haya siñansa di Bijbel, formacion spiritual y moral. Tambe e campamentonan ta bon conoci pa e atencion cu e lidernan ta duna nan e campadonan durante e actividadnan aki, y e dushi tempo cu e campadonan ta pasa na Washington.

Personanan cu ta interesa por haci un donacion na CJW tambe en conexion cu e 50 aniversario pa e Centro por sigui haci nan trabou den e comunidad. Donacion por wordo haci den efectivo riba anochi di e celebracion, 19 juni, of tambe via transfer di banco na RBC 144.4404. □